



坐車遊臺灣

現代人國內外旅行真普遍，政府嘛咧認真推廣，去外國招觀光客，閣獎勵國內旅遊，錢予家己人趁，這予我想起過去六十年坐車遊臺灣的滄海桑田（tshong-hái song-tiân）。

四歲的時陣，爸毋係我去下港割香迺迺。彼陣無觀光、旅遊、遊覽這款語詞，阮就是去割香、迺迺。交通工具就是火車、客運、撐渡船（thenn-tōo-tsûn）恰步輦（pōo-lián）。記持中就是北港割香炮仔乒乓叫（piàng-piàng-kiò），臺南坐撐渡船過運河，閣步輦去安平看「億載金城。」

國校迺迺叫做遠足（uán-tsiok），就是佇禮拜日租客運公司的車去迺迺。初中嘛是全款，毋過毋是日本味的遠足，是臺灣味的郊遊。猶原是坐客運公司的巴士。

大學的時騎腳踏車去高雄的月世界迺迺，看著對面山跤一陣遊客，三四十人穿甲花lok-lok，是一台巴士載來的。這陣，我才知影，這是遊覽車載觀光客四界旅遊觀光。彼年是1970年。

彼陣猶是農業社會，大人逐工佇田裡做工課，無拜六恰禮拜；阮平時讀冊，禮拜日就有一大堆田工課等我去做。遊覽車坐迺迺，莫想較無蠔（mài siūnn khah bô báng）。

想袂到臺灣快速進入工業社會，坐遊覽車四界觀光旅遊變做誠普遍，遊覽車嘛毋是客運的專利，有真濟遊覽公司專門咧做觀光遊覽的生理。

閣無佢久，就有規家伙仔坐自家用的去旅遊，我嘛有十外年的全家旅遊的經驗。頭起先，觀光所在人少車少，停車方便，後來汽車大量增加，觀光景點是人較濟過狗蟻，車較濟過番仔火盒，開車變成惡夢，我就退出這款旅遊。

現時坐車遊臺灣，是回轉去遊覽車時代，觀光景點有人載到位，三頓有人款便便，阮就是食清、睏宮、人精英，比神仙無較輸。

作者：邱文錫

☆詞彙學習☆

【割香】kuah-hiunn：進香。

【步輦】pōo-lián：徒步、步行。

【遠足】uán-tsiok：日本漢語詞，原指徒步小型旅行，後來指小型旅遊。

【莫想較無蠔】mài siūnn khah bô báng：意指少做春秋大夢。

【食清】tsiàh-tshing：吃飯不欠人情，不必感謝他人。

【睏宮】khùn-king：睡媽祖宮。

【人精英】lâng tsing-ing：整個人神清氣爽。

【食清】、【睏宮】、【人精英】此三詞原指乞丐的無憂無責的生活，此處沿用，一樣的無憂無責。